

写礼廌遗著

寫禮廟遺
著四種

年侍葉昌熾署

清故誥授資政大夫三品銜在任候選道記名御史軍機處
行走戶部湖廣司郎中先考芾卿府君事畧

府君諱頌蔚號芾卿又號蒿隱蘇州長洲人也先世當宋南
渡自汴隨扈而南卜居吳之洞庭東山十三世祖諱鑿諡
文恪仕明官至大學士乞休後居郡城遂著籍焉曾祖諱
仲淇號清川長庠附貢生曾祖妣氏顧氏郭祖諱朝華
號豐珊府庠附貢生議叙同知祖妣氏章氏鄒考諱仁
榮號欣堂吳庠附貢生候選訓導妣氏陸三代皆以府
君官贈二品封府君生於道光戊申年十月十四日時有
兄及女兒各二人生三歲妣陸太夫人卒賴繼祖妣鄒
太夫人鞠育之七歲就家塾所讀倍年長者每自塾歸則爲

諸兄抄錄文字或翻檢書籍業師戴揖蘇先生輒告人曰塾
中諸兒惟三元最爲不凡三元者 府君乳名也年十三四
子書及五經將畢時髮匪久據金陵以丹陽大營忽潰蘇城
遂陷 欣堂公奉 鄒太夫人率 府君兄弟避地婁門外
之草笠巷廬舍湫隘土地卑濕 欣堂公以腹疾卒長兄相
繼病歿 府君與仲兄擯擋喪事哀毀如成人於 鄒太夫
人前不露戚容以重老人之憂旋以草笠巷距城密邇寇氛
易迫乃奉 鄒太夫人避地海門流離瑣尾廢讀年餘至此
乃與海門周彥昇先生共學逾年而堂叔沐如公避地上海
招 府君同居遂奉 鄒太夫人至滬未幾 王師克復蘇
城始返故里歲丙寅應童子試邑令蒯子範先生置第一遂

入邑庠於時 府君於括帖外益肆力詞章之學試紫陽正
誼各書院輒前列旣而馮景亭先生主修蘇州府志聘 府
君任纂藝文古蹟諸門遂與府襄廷管申季袁渭漁諸先生
爲文字交與葉鞠裳先生契誼尤篤同受訓詁之學於潘
侯先生又同爲常熟瞿氏校定鐵琴銅劍樓書目左右采
獲時望益隆吳之學者咸推王葉齊名歲丙子舉於鄉庚辰成
進士改庶吉士於時都中先達以宏獎風流爲已任者爲吳
縣潘文勤公常熟翁文恭公文勤固中表戚文恭則庚辰座
主也尤雅重 府君 府君於往還之際談學問外絕不干
以私事故事殿廷考試皆於試之次日命大臣閱卷與試者
輒於場後致送詩片於師門及知交之有閱卷望者以通關

節 府君曰得失事小廉恥事大詭遇求進舉世不以爲非
問心能無愧乎故生平屢遇試事從未以詩片投入然散館
以桑林二字被抑及考試差又以區蓋二字被黜 府君淡
然無所動也癸未改官戶部趨曹餘暇手不釋卷以 昭代
經學超越宋明各經皆有補疏周禮爲歷朝典章制度所由
出獨無專書毅然以義疏自任發凡起例寔事求是爲生平
最勤心力之一又以前人譜錄金石皆致力唐宋以前惟遼
金元建都北方南省聞見宵遠紀載每多失實思以金石糾
正之乃有志搜羅近畿金石囑碑賈四出搜集先後得遼金
元石刻打本凡數千種時相與考訂稱同志者爲黃仲弢李
萼客梁星海沈子培諸先生而桐廬袁忠節公且以文字交

申之以婚姻丁亥傳補軍機章京入直趨曹稍有餘閒輒從事著述嘗於方畧館故紙堆中見殿板初印明史殘本眉上黏有黃籤審爲乾隆朝擬撰考證未竟之本因多方搜求逐條釐訂芟其鯨冗採其精要成明史考證擴逸三十餘卷庚寅分校禮闈搜羅篤古之士有浙卷文筆古峭絕似定盦按諸括帖則不中程式爲力薦於總裁揭曉則蔡子元培也光緒中葉以還言路閉塞朝政漸隳魯伯陽之簡江海關道王銘之簡四川鹽茶道政以賄成人言嘖嘖府君蒿目時局私憂竊歎嘗曰京曹官惟科道尙可抒其忠讜以補朝政之缺耳若我所居職終日疲精於抄寫役形於案牘直胥吏事一旦得居言路踵朱蓉生梁節庵後我願足矣壬辰試御史

第一 府君方幸藉此發抒生平之志會軍機處以熟手奏留停其傳補人皆以由京卿而尙侍作宦易達爲 府君賀

府君轉鬱鬱不樂時存歸思致書友朋每謂浮沈郎署於國無補於學有損不如早日乞休之爲愈也時臺諫中以安曉峯先生爲敢言 府君與之交密其劾皖撫阿克達春之貪黷劾北洋購買兵輪之浮冒等疏皆 府君屬稿 府君初任京秩俸廉甚薄輒以家中恆產所入補其不足雖米珠薪桂拮据殆甚 府君惟刻於自奉絕無向人告貸之舉嘗訓諸子曰古人儉以養廉之說其義最精今之居官貪黷身敗名裂者非必其天性無廉恥也大都由於奢侈妄費習慣已久非取不義之財不足以自給且舉債旣多則人之責償

於我者皆足迫我爲非義之舉又安能堅持定見以葆我清白耶迨府君直樞垣並任捐納房總辦所入稍裕而蔬布自甘一如向時有餘輒寄南中爲修葺先塋卹助親族孤寡之費嘗派充工程監督差故事凡各項官工廠商皆提工價之十一分饋各監督美其名曰節省銀兩府君獨卻之人謂府君此例沿行已久承修大臣有受之者奚必辭

府君曰我輩取與之間貴自審慎不可隨俗浮沈昔陳稽亭先生官部曹時卽給公項且猶不取矧此節省銀兩實爲廠商之賄賂乎甲午中日釁起府君以政府命將遣師率問計於北洋大臣而中樞反無所主張會翁文恭公進軍機乃進言曰恭讀聖祖高宗兩朝聖訓凡事關軍務者皆由

中朝謀定後動今日戰局旣成非直隸一省事豈能悉諉之
北洋且樞府旣有總持軍機之責尤當先知戰地情形今軍
機處中並高麗地圖而無之每遇奏報軍情地名且不知所
指安有運籌帷幄決勝千里之望乎於是樞府始令北洋進
高麗地圖至則所圖並不開方計里疏畧殊甚府君乃四
出搜求遇友人之東游歸者搜其書簞得一紙則日本報館
中所附之高麗圖也凡鐵道港口電綫一切皆羅列府君
乃歎曰敵人謀之非一日我乃臨渴掘井如何制勝憤懣久
之旣而王師失利償金割地委曲求和府君益爲悲憤
嘗曰今之敗績徒歸咎於師之不練器之不利猶非探本之
論頻年以來盈廷習泄沓之風宮中務游觀之樂直臣擯棄

賄賂公行安有戰勝之望此後償金既巨民力益疲恐大亂之起不在外患而在內憂時局至此令人有披髮入山之想又云 先祖 先父俱年未登五十余殆不能過其厯乎悵悵累月竟於乙未七月初一日驟染時疫歿於京師易簣時惟次子季同侍側諭之曰死非我所憾惟汝曾祖母 鄒太夫人年逾七十我本擬旦夕乞休歸盡反哺之忱不克如願此可憾耳爾輩兄弟平日和睦吾可無憂惟將來立身處世之道務宜自謹我族自明以來如 文恪公 承天公皆爲有明名臣未仕者亦皆世爲諸生以篤行見重鄉里而 道樹公以明亡隱居胥莊終身不入城市尤足以勵臣節余但望爾輩讀書得青一衿爲鄉里善人無墜家聲斯可矣春秋

四十有八遺著有寫禮願文集詩集讀碑記古書經眼錄各一卷周禮義疏殘稿若干卷明史考證攬逸三十餘卷寫有定本爲袁忠節公借刊庚子之亂忠節遇難稿遂散失至今訪求未獲歿後三年葬於吳縣西跨塘狀元浜萬樂山麓之栲栳灣配吾母 謝夫人同邑松甫公女持家節儉訓子嚴明 府君歿後鑒於時變勗諸子遠游求學諸子粗能自立則歲舉 府君遺產息入千餘金設振華學校於蘇城躬親校務不自暇逸子五季烈長庠生壬寅科舉人甲辰科進士刑部主事調學部補員外郎升郎中任專門司司長京察一等記名道府兼充京師譯學館監督資政院欽選議員於辛亥十二月去官季同京師同文館學生升副教習外務部七

品繙譯官歐洲游學生監督處辦事員出嗣族兄薇卿公後
季鑒殤季點吳庠生游學日本東京高等工業學校畢業應
學部試給工科舉人廷試授內閣中書官農工商部主事充
京師大學堂格致科提調現任農商部技正北京工業專門
學校教員季緒游學英國園橋大學畢業現充北京工科大
學兼工業專門學校教員女六長殤次適費適袁次未字次
適何適程孫十一守約殤守兌守圻殤守則守夏殤守熾守
競守存殤守泰守鼎守恥圻競恥均隨季同出嗣女孫十一
殤者三 府君歿後之二十年季烈避地海濱深恐 府君
著述日久就湮敬將遺著四卷校錄付梓周禮義疏則 府
君未成之稿曹學無知尙難寫定 府君道德文章非小子

所能窺見萬一輒追憶幼時所聞及親得於 府君者撮陳
大概冀

當世閎達知我 府君者錫之誌傳則吾世世子孫感且不
朽

乙卯孟秋之月甲戌朔越七日辛巳長男王季烈謹述

年愚姪章鉦頓首拜填諱

寫禮廬遺箸總目

文集一卷

駢散文二十四首

文集補遺一卷

散文一首

詩集一卷

古今體詩九十一首

古書經眼錄一卷

題識四十三條

讀碑記一卷

題跋五十二條



寫禮頤文集

長洲王頌蔚蒿隱

恭進平定陝甘新疆回匪方畧表

代

欽惟我皇上德峻同天量閎括地握三靈之寶契

續十葉之休符黃屋凝神聖表彰乎玉斗璇宮養志

孝治協於鈎鈐文思宴而萬邦和武義璜而七德舞

天保治內采薇治外攬大小雅以儲才甲夜觀事乙夜

觀書居左右个而聽政年和氣淑魏徵醴泉之銘澤

洽威宣終軍奇木之對考于靈曜間衡格四表之光

奉以中黃瀛海奠九州之大伊慮產里闕耳離身之國陶詠

乎侏任紈牛露犬乘黃茲白之貢焜耀乎旌羽固已邊亭卧

鼓畿服清塵銷甲而事春農糞車而卻走馬惟是 五始受
圖之載曾訂九開柔武之文洎乎偃伯歸詈之年遂定分類
居方之制則有筠冲衍派景教流行奉穆罕默德爲宗習甫
爾加尼之典隋開皇之世思葛以綴術來華唐元和之初摩
尼與賈胡作蠱太原置寺而彼教遂布寰瀛洪武譯經而其
徒益樹徽幟於是爰劒之種近依賜支槃瓠之苗入居祿福
允姓東徙及於渭汭轆轤貲虜南牧置諸武威張掖當夫三
垂桀晏九服清怡邊障無鹿駭之憂郊輒有麇游之瑞雖復
月氏遺孽散處西河日逐名王潛來北地而仁覃葭葦乳虎
亦復含牙食裕桑葢翩鴟自然革響迺自長櫓彗地枉矢流
天徵側盜桂管之兵楊么踞湖湘之岨嶺南羣盜斗米書符